

欽定大清會典事例

欽定大清會典事例卷九百二十五

工部

水利

畿輔二

嘉慶四年

諭挑濬熱河並獅子溝等處旱河工程動用銀款較多。其勘估工段及工竣查驗自當奏明特派專員以昭覈實。嗣後每年挑濬工竣俱著該道報明軍機處請旨辦理。○又挑挖牯牛河黃家河北邨引河間段淤積並新安等九州縣河道隄塍一律挑濬修築。○又奏准熱河二道河大沙隄東邊增榆固一

路長二百三十丈。○六年奏准子牙河西岸並
念祖橋劉谷莊等處圍築月隄改建牆壁。○又
修築永定河一帶決口隄岸石景山石隄漫口
四處長三百二十四丈五尺。拆補拘抵坍塌
裂石隄長二千二百八丈。補築背後戩隄長一
千七百二十七丈四尺。築打二十三號攔水
壩二道長四百六十九丈。二十三號引河剗挖
砂石長四百六十五丈一尺。南北兩岸堵築土
隄漫口十八處長三千四百二十三丈。補還舊
埽長七百四十七丈。新添險工埽段長一千四

百七十七丈八尺。引河創挖砂石。挑挖淤灘。長一萬五千一百十九丈。裁灣取直。長一千三百七十六丈。疏濬下口。挑挖中泓。長三千八百七十九丈。南北兩岸三角淀土隄。加高培厚。長二萬七千一百一十二尺。○又

諭。永定河水勢漲漫。決口四處。而南岸決口尤寬。竟致掣動大溜。必因下流壅塞。水無去路所致。今據奏勘永定下游。見河身內無急湍長流。且附近居民。已有在河身內高阜處所種植秫豆。其南岸隄外。並有涸出地畝。趕種晚菽之處。可見下游高仰。已非一日。皆

由歷任河道。因循不辦。現在永定河大溜。盡已掣入
盧溝橋東南。直走黃邨南苑等處。若不設法。使河流
仍歸故道。則南苑一帶。豈不竟成河流熟徑耶。此時
伏汛漲盛。口門一時不能堵築。惟有開它引河。吸溜
歸槽。最為目前第一要務。著相度地勢。何處可以開
它。何處可以開挑。即稍占地畝。亦屬無可如何。至開
放引河。必先使下游無高仰處所。去路方無阻滯。今
永定河下游。既有淤塞。自宜及早疏濬。並著悉心籌
畫。應於何處施工。務俾下游通暢。為將來開放引河
之地。○又

諭明安奏估挑紫禁城內外大城以內各河道及圓明園西南角引河一摺。禁城內外及圓明園一帶河渠。原以消納積水。如果管理之員留心察看。聞有停淤。隨時挑挖。何至於塞乃爾。皆緣歷任承辦官員及管理大臣。因循不辦。藉詞省費。年復一年。聽其壅塞。是以本年雨水稍大。無可疏洩。甚至圓明園宮門左近。均有積水。而西直門外一帶積水更深。所有各處河身淤淺之處。不得不大為估辦。設伊等早能隨時查辦。閒段興挑。則每年所費。亦不過數百金或千金而止。又何至此時需費至七萬五千餘兩之多乎。是歷

任大臣官員惟知顧惜小費。心存玩忽。轉至此時多糜帑項。咎實難辭。自乾隆五十年以後。所有承辦官員該管大臣。分別著賠。以示懲儆。○七年。堵築河間縣高家口衝決隄堰。○又修築南運河兩岸要工。並挑濬捷地興濟減河。○八年。挑挖溫榆河新淤五百四十丈。自工部稅局至藥王廟一百三十六丈。內八十丈挑深三尺。五十六丈挑深四尺五寸。藥王廟至東嶽廟一百三十四丈。挑深四尺五寸。東嶽廟至席廠一百二十五丈。挑深四尺五寸。席廠至流水溝一百四十五丈。挑

深四尺。嗣後有無淤墊。應否歲修。統交倉場侍郎隨時確查情形。另行奏明辦理。○十四年覆准。宣化府城外護城石。輒土壩工內。環字號被衝石壩長十二丈。臨字號石壩長四十七丈。邊字號石壩長六丈。拂字號石壩長三十八丈。砥字號輒壩長十八丈。桂字號石壩長二十八丈。三尺。秋字號石壩長五丈五尺。安字號石壩長六丈。均係險要壩工。改建雙進條石。○十五年諭。溫承惠奏直隸河淀淤墊情形一摺。畿輔水利關係民生。必須盡心講求。通盤籌辦。今唐河等河七十二

川之水向之由西淀入東淀分三股下注者近年自趙北口十二連橋以外已多淤墊又北股中股悉皆淤塞僅存南股一綫單渠以洩上游諸大川之水其勢自難容納而東淀下游至楊家河一帶二百餘里又復節節淤淺以致上游往往潰決附近各州縣邨莊地畝處處被淹小民種藝無成逃荒失業每年議蠲議賑補救不遑而各處大道通衢亦常被水淹浸以致車馬不便有礙經行殊非體制溫承惠摺內稱約計需數百萬金一時礙難請撥且南河大工尚在未竣應俟經費充裕再行辦理今先委員將趙北口

以下淤沙。擇其至要之處。相機疏導。並勸用民力辦理等語。所見尚淺。國家經費有常。原不可以濫用。然關繫生民要務。則雖多不容靳惜。若如溫承惠之意。必俟南河一切功竣。始行興辦。則南河工程甚多。難以剋期辦竣。豈有因此而令畿輔要工。日久延誤之理。至於民力有限。勢必不敷。徒滋科派之累。此事竟當通籌全局。發帑興辦。以籌水利而衛民生。因思天津鹽務加價一項。本為南河辦工而設。今即移以辦直隸河工。同係正用。此外尚有天津關稅一項。著溫承惠即與嵩年會查此兩項。每年應解戶部內務府

者共有若干。直隸籌辦水利。通計實需銀兩若干。幾年可敷辦竣。著覈算明晰。據實奏聞。候朕降旨施行。

○十六年。疏濬玉田縣雙城河。○又題准。涿州北關外拒馬河水勢旁洩。不能全由故道行走。與關廟居民橋座。均關著重。於北潭邨頭築做土隄十六丈。再接築挑水壩一道。長四丈。又接築攔河壩長五十丈。壩尾又接築土隄一道。長二百十丈。工尾埽灣喫緊之處。至涵洞止。接築土隄長四十五丈。再於兩河全流處。挑挖引河三段。共長三百丈。○又題准。萬全縣張家口下

堡地方第三團營房前。舊築灰土壩一道。因被水衝塌。亟應修整添築。共工長一百丈。以資捍衛。○十七年。修濬天津靜海兩縣河道淤墊。○十九年。疏濬大名清豐南樂三縣積水。○二十一年。奏准豐甯縣黃姑屯

行宮。貼近波洛河。原築土隄。改築魚鱗園壩。以資保護。○二十二年。疏濬清苑縣護城河。自西關至南門石橋。長一千三百丈。曹河支河。自清苑縣境接安肅界起。由馮家莊千佛庵繞至北門。迤西入護城河。長一千二百三十丈。安肅縣自

曹河南岸慈航寺前。至清苑縣界。長二千三百九十丈六尺。○二十四年。堵築清河縣邵家莊月隄漫口。迎面添做護埽。鹽邨店至唐家口。修築月隄一道。油房邨大王廟前。河勢側注。隄岸齧蝕。改做草工一段。○二十五年。修築宛平良鄉房山涿州新城容城雄縣任邱河間肅甯獻縣交河阜城定興安肅清苑滿城望都安州高陽蠡縣大道。並修築雄縣十三里鋪迎水壩一道。○又修築霸州忙牛河隄。加培大名元城南樂清豐境內漳衛二河縷隄。並濬河身。○又修

築涿州拒馬河邊埽防風埽大埽難背壩。○道

光四年

諭程含章奏請籌款速辦直隸水利一摺。據稱直隸通省工段繁多。不能同時並舉。惟先將各河淀一律挑挖寬深。然後將各州縣支港逐一疏通。俾民間旱潦有備。其承辦工段。必須分段責成。各道府各率所屬州縣佐雜。並紳士農民。各治所屬之水。較委員承辦。費省工倍。此番工程浩大。除永定河例係官修外。其餘挑河築隄。既難概照土方。致滋多費。而連年災歉。惟照以工代賑之例。為得事理之平。所奏均屬可行。

程含章日內即可自京起程。著蔣攸銛會同籌議。務須和衷共濟。於該省水道農田。兩有裨益。為一勞永逸之計。○又挑挖正定縣境內柏棠河。暨東南西護城河。東大道河。洩水河。計長六千九百八十二丈五尺。補修縣城西南斜角迴水二隄。加高西門外疊道三段。○又奏准清苑縣大激店鄉舊有護道土隄。改建灰土泊岸。長四十二丈五尺。○又修築保定府城西關外大牘迤北土隄缺口。○三年。疏濬吳橋老黃河一道。長七千七百七十丈一尺。○又奏准任邱縣白石碑民隄漫

決繞築月隄六十三丈。○又奏准元城縣紅花
隄缺口。迤下新刷水溝。由館陶之徐家倉入衛。
計五百餘丈。因勢挑成河道。分流洩水。並建東
西兩隄。覈計地畝。豁免錢糧。給還地價。○又

諭程含章等奏治水大綱一摺。直隸全省水利。經程含
章會同蔣攸銑督率各道。將緊要處所逐一查勘。奏
請先理大綱。興辦大工九處。如疏通天津海口。疏濬
東西淀。大清河。及相度永定河下口。疏子牙河積水。
復南運河舊制。估辦北運河。修築千里長隄。均著照
所議分別估辦。此外如三支黑龍港。宣惠。滹沱。各舊

河。沙洋。沼。滋。汶。唐。龍。鳳。龍。泉。潯。龍。牯。牛。等。河。及。應。修。文。安。大。城。安。州。新。安。等。處。隄。工。著。分。年。次。第。辦。理。各。州。縣。支。港。溝。渠。著。飭。各。地。方。官。俟。秋。收。後。勸。諭。農。民。按。畝。出。工。挑。挖。以。資。消。洩。○。又。

諭。戶。部。奏。籌。撥。直。隸。水。利。不。敷。銀。兩。著。照。所。請。在。撥。給。

直。隸。兵。餉。改。解。部。庫。之。長。蘆。鹽。課。內。撥。銀。二。十。萬。兩。再。撥。本。年。山。西。地。丁。銀。十。萬。兩。山。東。地。丁。銀。五。萬。兩。河。南。地。丁。銀。五。萬。兩。共。撥。銀。四。十。萬。兩。著。各。該。撫。鹽。政。派。委。妥。員。務。於。今。冬。解。到。直。隸。藩。庫。以。備。工。需。其。餘。二。十。萬。兩。仍。令。廣。東。江。西。浙。江。三。省。於。續。收。捐。監。

銀內儘收儘解。俟湊足二十萬兩後。即行歸補封貯。並將撥解銀數。報部查覈。該省辦理水利工費浩繁。朕軫念民瘼。不惜帑金。該侍郎等務須妥為督辦。總期工歸實用。帑不虛糜。不得如北運河朱家馬頭。甫經修隄。即有漫溢之害。如有不肖官吏。侵蝕誤工。虛糜帑項。即著據實嚴叅。○又疏濬任邱。雄縣境內大港。引水河。宣洩新安等處積水。○六年。修築寶坻縣引河隄堰。長五千九百四十丈。○又修築北運河上游香河縣境牛牧屯卽決口六道。計二百餘丈。挑挖三河縣之魯家橋淤墊二段。寶

抵縣東南鄉袖鉞河土堰二道南岸加隄一道
令河流達淀以入海。○又奏准藁城西北為漳
沱河下游添築魚鱗埽工八段長四十六丈舊
有護城隄三百九十丈月隄百五丈加高培厚
於沙磧以北開引河一道長七百丈口寬八丈
底寬三丈深一丈並於河尾做草工盤護一段
長二十一丈寬一丈五尺深一丈所開引河每
年伏汛以前勸諭士民疏濬一次。○八年奏准
衡水縣老龍亭牐口迤南舊溝挑深八尺與石
牐金門底石相平。又疏通鹽河並濬滏河。○九

年修補萬全縣張家口大境門外。東北兩石壩決口。一百七十四丈。挑挖引河。並拆修第三圈護營灰土隄一道。○十年。疏濬保定府南關外河身。長五千三百六十七丈。並修建徐河石橋。○又疏濬漳河。長四千五百十四丈。挑出之土堆於南岸十丈外。接築土埝。○十一年。加培獻縣河間境內子牙河隄工。○又熱河挑挖旱河。並添築虎皮石壩。○又新築永定河南隄遙埝。並做淀金門護埽。又舊河十五號。至汪兒淀。添攔河大壩三道。計長一百六十丈。北七工。自二

十六號起至四十六號止。加培隄埝。又南二工金門牐。加高石龍骨一尺二寸。並迎水片石坦坡等工。○十二年。修通惠河平下。南浦二牐。○又修通州果渠邨壩埽。○十三年

諭。本日據戶部奏請興修直隸水利城工。以工代賑等語。直隸連年亢旱。所有附近民田之溝渠陂塘。應即擇要興修。以資灌溉。其應修城垣。亦可擇要修補。著該督即行派委熟諳水利工程大員。督率各州縣確切查明。如係刻不可緩之工。剋日興修。以工代賑。儻有吏胥從中侵漁等弊。即著據實叅辦。並著祝麟迅

速將本年應交水利生息銀十一萬兩。先行照數提出。委員解交直隸藩庫應用。現在京師河道工程。將次完竣。在京貧民。即應資遣回籍。該省工作既興。小民亦得藉資果腹。該督務當妥為籌辦。毋令流離失所。○又

諭。御史帥方蔚奏直隸各州縣每當夏秋之間。大雨時行。田畝多被淹浸。道路亦且淤阻。或遇雨澤偶愆。又復難資灌溉。皆由溝渠不立所致。今南方民田陂塘渠堰多係民修。直隸水利事宜。亦可令民間自行修建。勢不能盡仰官辦。現在停賑之後。應令民間次第

修舉其赴工就役各視地畝多少為差大小溝渠相
度地勢隨宜疏濬務令水有所歸不使漫溢為害等
語。國家久停力役之征至開挑溝洫乃因利利民之
道總在各該地方官平日留心講求董率有方自然
旱潦有備著琦善察看地方情形是否可行悉心妥
議具奏。十四年疏濬良鄉縣茨尾河重建雅河固
邨及西關石橋。十五年奏准大城縣藏家莊
等十七邨民溝官河一體挑濬俾河水次第歸
淀。又改建唐縣護城雙進石壩並東西滾水
壩等工。十六年

諭御史朱成烈奏請疏築河道隄工一摺。據稱直隸保定府蠡縣之豬龍河歲修向係民間折價入官雇工修濬。近二十年來竟交書役估辦。兩隄之上舊土翻新。其實未加一簣。豬龍河經由蠡縣不過數十里。該縣每年修隄折價一次。斂錢六千串。如果工歸實用。何至水患頻仍。獻縣之子牙河及任邱之十二連橋。或隄勢低微。或淤成平地。又聞海河之口近亦填淤。故東西淀之水不能暢出。以致低窪處所積水不消。請責成地方官商用民力設法疏通等語。直隸省興辦水利。本有奏定章程。如地方官實心經理。則水患

可去。水利可興。著琦善將該御史所奏情形。悉心體察。填淤之處。設法疏通。殘缺隄工。趕緊修復。無論歲修。本有公項。及借用民力者。均須覈實辦理。毋任吏胥侵漁。如有浮冒各情。即將該地方官從嚴叅處。以防旱潦而衛民田。○十八年。疏濬豐潤玉田二縣境內之黑龍河。其南北岸橫堰。不許加增爬毀。每年農隙。令沿河邨民挑挖新淤。○十九年。挑濬大名元城清豐南樂等縣境內之衛河。○又修築滄州減河石壩。○二十三年。奏准東光縣趙家隈故城縣鄭家口北民堰。向係借項修築。攤

徵還款。此次在捐輸項下撥用。後不為例。○又修築萬全縣張家口大境門外石壩。長四百七丈。○二十八年。萬全縣張家口大境門外石壩被水衝失。復行修築。○咸豐三年。

諭。前任太常寺卿唐鑑呈進畿輔水利備覽一書。朕詳加披閱。於西北水利言之甚悉。其水道各圖。按照各府州縣條分縷晰。亦極詳覈。近年東南各省漕務疲敝。若畿輔地方。廣興水利。於國計民生大有裨益。著桂良於直隸軍務告竣時。悉心體察各屬地勢。酌度情形。派明幹大員。前往履勘。妥為籌辦。畿輔水利章

程本有成案可稽。前此屢興屢廢。總因地方官先存畏難之見。輒以一奏塞責。該督務須認真督辦。切毋視為具文。致負委任。○六年。修築萬全縣張家口大境門外小北門外護城石壩。○同治元年

諭。國家建都燕京。歲漕東南糧米數百萬石。勞費不貲。允宜妥籌北省水利。以裕民食。而省轉輸。直隸通省地方。西北倚山。東南濱海。凡山泉匯注。及海潮湧灌之區。均可開河築壩。引水灌田。俾成沃壤。康熙年間。天津鎮總兵藍理曾於天津地方。開溝築壩。引溉稻田。著有成效。雍正年間。曾於直隸設水利四局。經怡

賢親王及原任大學士朱軾辦理。歲收稻米三十餘萬石。明效在前。彰彰可觀。地方大吏果能如監理等之留心經濟。力求足民裕國之謀。即南省漕糧。偶有梗阻。亦何慮倉儲之缺乏耶。著直隸總督順天府府尹速將所轄境內山泉河渠淀湖共若干所。並可開渠引水地方若干處。切實查明。繪圖貼說。詳細具奏。

○又

諭。文煜等奏遵籌畿輔水利一摺。所陳水道原委。及從前辦過成案。暨今日缺水情形。尚屬詳悉。此事裕國足民。兼可為京倉儲備久遠之計。自應悉心籌議。設

法舉行。惟河道旱潦不時。井泉旺涸無定。儻非籌畫盡善。必致始勤終輟。迄無成功。文煜等所稱有可舉行之處。或礙於地界。或限於力量。或當掘井製車。或須抽溝築圩。均可設法催勸。所需經費。即今就地勸捐。推行盡利。各等語。自係為節帑興利起見。第小民可與圖成。難與慮始。全在該督等慎選循良官吏。及熟習水利人員。認真履勘。妥為勸導。使民間知水利之有利無害。踴躍趨工。方能怨謫不興。一勞永逸。否則利民之政。轉致病民。殊非朝廷廑念民食之意。文煜萬青藜石贊清。務當懍遵前旨。熟計妥籌。次第奏

請舉辦。總期因地之利。順民之情。事出萬全。不在遽求速效。其直隸境內現有稻田若干。以及河道井泉水車情形。俟著侯查勘齊全後。隨時據實具奏。○十年。修築開州金隄。○十二年。

諭前據大理寺少卿王家璧奏請飭查林則徐條奏畿輔水利原摺。妥議籌辦。並陳疏濬溝洫事宜各摺片。畿輔水利。雍正年間。曾墾田數千頃。原任兩廣總督林則徐疏請仿照成法試行。謀畫深遠。近年直隸河患頻仍。若以治田者治水果能辦有成效。於國計民生實有裨益。著李鴻章查照林則徐原奏體察情形。

酌度辦理。○又奏准修築正定府城南斜角隄八百餘丈。迴水隄一千六百餘丈。城西北漕馬口隄五百餘丈。○又奏准趙王河下口鷹嘴建牐一座。設牐夫十二名。每名歲給工食銀十二兩。遇閏加增。豬龍河下口撈挖積淤。每年工費銀五百兩。均在清河道庫存河淤地租項下動支。免其另案造冊報銷。○十三年奏准裏河兩岸修築沿河隄岸一百八十丈。○又疏濬天津三岔口。迤上永定。漕淀。大清。北運。四大河交匯之陳家溝至塌河淀。二千七百餘丈。自塌河至薊運。

萬四千一百餘丈。寬深自一丈至五丈不等。挖出廢土堆兩岸十丈以外。藉作長隄。修橋五座。其河身佔用民田廬舍。給價遷移。○光緒元年奏准。無極縣境內滋河。豬龍河。隄。任邱縣千里。隄。安州南北隄。雄縣南老隄。西槐支河。隄。趙邨新壩。新開趙王河六十里。蘆僧河百三十里。保定縣清河。埝工。各工歲修。於各河道庫解存各州縣河淀淤地錢糧項下。撥銀三千兩。按年工竣時。將工段丈尺。並承辦各員保固切結。送部備查。別項工程。不得援以為例。○又奏准。文安

縣勝芳邨之東。自齊家河經大城縣霸州至靜海縣之楊芬港。舊有河四十里。年久淤塞。亟應疏濬。並修築齊家河。上至中亭河。楊芬港東鳳河隄埝。○又奏准新城縣蘆僧河頭築灰壩一座。截安仁邨大清河大灣。築攔河挑水各壩。以衛隄岸。○又奏准靜海縣楊芬港勝芳河尾開河。至天津鐵頭地。匯大清河入海。北岸築隄。以利農田。永定河下游李家場開河。至鐵頭地西岸築隄。以洩永定鳳河之水。又加修上游文壩中亭等隄。萬三千三百餘丈。沿隄栽柳護隄。○

七年奉

慈安端裕康慶昭和莊敬皇太后

慈禧端佑康頤昭豫莊誠皇太后懿旨。前據左宗棠奏
擬調各營先修水利。當諭醇親王奕譞酌覈具奏。茲
據奏稱興修水利。機不可失。事同創舉。請飭恭親王
奕訢總司其事等語。畿輔水利。自雍正乾隆年間興
修後。歷年既久。地勢河道。今昔異形。旱潦無從蓄洩。
關係民生。甚為重大。自應及時籌辦。著派恭親王奕
訢醇親王奕譞會同左宗棠暨直隸總督李鴻章兼
管順天府府尹童華等。妥議章程。奏明辦理。○又奉

慈安端裕康慶昭和莊敬皇太后

慈禧端佑康頤昭豫莊誠皇太后懿旨。李鴻章奏覆陳直隸河道地勢情形。節次辦法一摺。據稱近畿水利。關係國計民生。頻年逐漸經營。將各河擇要修濬。因需費繁鉅。未舉大工。考諸往昔成案。揆之目下情形。通盤籌畫。惟有次第酌辦等語。著恭親王奕訢。親王奕譞。會同左宗棠。李鴻章。童華等。酌度情形。隨時妥商辦理。○又奏准挑挖大清河下游。自古各莊起。至台頭淀止。淀身人力難施之處。用機器船接挖。渾沱河從獻縣朱家口至野廠北入子牙河。

沿河沿隄。安設木橋船隻涵洞。以便行人而洩積水。○又奏准加修子牙河隄。萬七千四百餘丈。文安縣西隄。二千九百六十餘丈。河間龍華橋。挑新河。閉舊河。做埽五段。大城縣王家口展寬橋座。挑濬支河。靜海縣展寬東隄。二千四百八十餘丈。大城姚馬渡以下至楊柳青。移攔河民埝十七處。皆官工。加修河間獻縣東西隄。大城靜海青縣東隄。白楊橋一帶東岸民埝八十餘里。展移至三百丈以外。皆民工。○八年奏定。清理東淀水道章程四條。一定界址。凡有過水。

道及現在水深數尺。尚有定形之處。永禁栽墾。其中有完納葦課水泊等糧者。豁免。若久被淤墊。驟難收回者。令於地中多開溝渠。使水流貫。一。設堡船。淀中撈泥。空淺。惟藉堡船。凡礙水之蘆葦。芡草。隨時芟刈。應就所收租息多少。以定船數。一。議租息。凡不甚礙水道地畝。有糧者。照舊完納。無糧者。從輕議租。上等每畝三分。次則遞減。惟淀中漲涸無定。毋庸升科。一。均差徭。淀地皆在水濱。升科且難。何況差徭。乃州縣苛派書役需索。大戶影射邀免。反累貧民。應分別裁

減均平。○又奏准河閒府開辦井工共一萬一千六百二十四眼。官給工費。○十年奏准通州張家灣迤東之北運河新衝河道築攔水壩兩道。○又奏准鳳河上游自五空牖至大興采育間段挑挖並築攔水壩十四丈。采育至武清縣上村挑河身九千二百九十丈。武清押行邨至天津韓家墅築東隄八千二十六丈。堵緹上邨等處缺口八道。○又奏准熱河廣仁嶺迤東並獅子溝旱河大小修工程在熱河道庫動支小修年分不得過三千兩。

欽定大清會典事例卷九百二十六

工部

水利

山東

山西

河南

山東○康熙二十九年。修復郟城縣禹王臺舊址。遏洩水。使由故道。以免沂郟。郟宿。嶧諸州縣水患。○三十三年。山東省小清河漫溢。築青沙泊南隄。疏濬孝婦河。俾會清河水入海。以免新城高苑諸縣水患。○四十三年。疏濬戴邾壩淤塞舊河。築和尚林越隄。遏水仍歸故道。以免東平州一帶水患。○雍正三年。開濬小鹽河。並疏

治膠萊新河。○四年。挖濬濮州之魏河。聊城之洩水河。並開濬鬲津趙牛等河。○五年。疏濬濟南府屬之管氏倪倫溫聰濠刁强等河。○又覆准東省安山湖開濬支河六道。並於六隄口建牆以利節宣。○九年。議准戴邨新壩拆低與舊壩相等。高岸改作漫坡。洩水通沙。○乾隆四年。奏准開濬小清河。自山頭店至萬家口。及還河清沙泊。逐一疏通。隄岸照舊修整。對門郭家二口隄岸。加培高厚。圍築月隄。以為重門保障。改軍張牆為滾水石壩。疏通支脈溝。俾水循軌下。

注下截河自灣頭至淄河門逐一疏通兩截分
行尾閘通達庶水有歸宿永免泛溢○五年議
准濟南府屬之繡江河自四營莊上至明水鎮
下至金盤莊計長二十里資以轉石礮灌稻田
北口應建設滾水鐵心小壩以備節宣○六年
奏准臨清德州館陶夏津武城恩縣德州衛諸
處因漳水全歸運河與衛水文水合流爭趨勢
甚洶涌開通直隸省元城縣和兒寨邨北河溝
與漳河故道相連嚴禁小民築壩阻水聽其宣
洩以分水勢臨清恩縣一帶民修隄堰酌量增

培分別修築。又加修聊城縣護城隄岸。○又覆
窪宅濬德州迤東陵海豐等州縣子河。宣洩運
河內漳衛汶漲發之水。由鉤盤河達老黃河入
海。以衛德州一帶及直隸省吳橋等縣民田廬
舍。○十二年

諭據山東巡撫奏稱沂州府屬之蘭山郯城二邑河道
淤塞。隄堰坍塌。為每年被水之田。應動帑修築等語。
疏築隄堰為利民之舉。且二邑河道淤塞。以致屢被
水災。以工代賑。實屬應行。但河務所關。須將上源下
委。審度周詳。然後可以興舉。著悉心妥議。勘實奏聞。

欽此遵

旨覆勘沂州府屬蘭山。郯城。二邑河道隄堰上下周環。循源溯委。按沂河發源臨朐縣沂山西嶺。會沂水。蒙陰。費縣諸處山河之水合流下注。經蘭。郯二縣。至江南省邳州蘆口分流。一由徐塘口入運。一入駱馬湖。由六塘河歸海。蜿蜒數百里。地勢建瓴。土性浮鬆。下游武河陷泥。芙蓉燕子等河。瀰漫相連。向有民修隄堰。應寓賑於工。以衛田廬。蘭山縣境內。舊有柳青河一道。起自縣城。迤北雲白湖。下達齊溝。歸入沂河。郯城縣境內。

舊有墨河一道。起自縣城東北墨泉。下達江南宿遷縣境內。歸入駱馬湖。一併開濬。以洩卑窪積水。○又議准青州府屬彌河一道。經由臨朐益都壽光等地方。受龍泉南陽七里河諸水。東北入海。去夏山水暴漲。河東岸衝開一百五十丈。舊河口淤起沙埂。應堵築決口。挖平沙埂。以資捍禦。孫家窪之東。開濬引河。導入淄河。以資宣洩。上游各窪。層層開濬。疏消積水。○又議准蘭山江風口河脣。建碎石滾水壩五十餘丈。約攔水勢。俾歸正溜。河形深處。亦建碎石滾水壩。

一百六十餘丈。尋常之水。由沂河循軌下注。有餘之水。滾減而出。一由漿水汪入武河。出邳州沙家口入運。一由漿水汪出柴口。仍歸沂河。以緩其勢。並修補清水龍潭胥家壩等口。河形深處。酌建碎石戽工。填砌吳家口。以減其勢。並於李家莊馬頭鎮。河水兜灣之處。臨河一面。填砌碎石。以資捍禦。○又奏准山東運河。北自桑園與直隸接壤。南至臺莊與江南毗連。自北而計之。初受漳衛之水。次受汶泗之水。又次接沂河之水。下流注於黃淮。河身兩旁。承以諸湖。東

以長隄東隄蓄納西隄宣洩水小則開湖以濟
運水大則藉湖以受水其間山泉坡水汙水支
港與夫牐壩涵洞橋梁斗門皆關蓄洩機宜應
隨時修濬○二十三年議准山東省沂泗府洸
白馬沙魏清趙馬頰徒駭老黃等河動帑興挑
完竣一律深通第濱河居民水涸時各圖往來
近便墊作路埂易致水壅沙積更有貪利愚民
於河身私植蘆草尤易淤塞責令地方官於每
年汛後逐一查勘如有淺阻梗塞之處督率民
夫挑濬搭蓋木橋年終出具印結詳報如有失

時不治。墮廢前功者。該管官照要緊隄橋不行。豫修例。罰俸一年。兼轄官罰俸六月。至伏秋大汛。運河水漲之時。始行開放涵洞。每不能暢洩。應於每年霜降後。道府大員親履查勘。乘水小時。開放涵洞。疏消陂水。俾得趕種春麥。著為定例。○二十四年奏准。運加二廳屬大挑石佛壩以下長河。並建築攔河壩工。○二十七年奏准。德州城外酌挖引渠。以重漕運。○二十八年。拆修上河廳屬李家務石壩。○又奏准。衛河來源過盛。應將四女寺支河展寬。以防盛漲。○又奏

准籌消濟甯魚臺積水。開它荆山橋河。以衛民
居。通漕運。○又覆准運河廳屬臨運洪仁橋單
牘。移建於開河大牘迤北。並於湖南修砌碎石
工長三丈五尺。○又奏准河東姚暹渠。飭令運
同會同地方官。於每年農隙水涸時。雇夫挑濬
其所挑之土。用以培堰。○二十九年奏准武城
縣運河東岸之牛尾窩祝官屯。西岸之馮家灣
三處各建石牘。○又奏准接築韓莊滾水壩。並
建石牘。○三十年奏准韓莊等處水口。增設滾
水壩石槽牘板。並濬修八牘。○又奏准德州城

外西方庵引河隄工。化險為平。埽工永行停止。
○又覆淮。泗河廳屬微山湖攔門灘中挑引渠
三道。以廣宣洩。內毗連正渠。北一道長八十三
丈。寬六丈。又迤北一道長六十六丈。寬十五丈。
又近隄一道長五十四丈。寬四丈。各深二尺。
三十三年覆淮。嗣後姚暹渠堰如已在保固限
外。尚未屆輪修年分。工程間有衝刷。難資防護。
應照挑淤例。於每年農隙時一併估修。所用銀
兩。統於額定輪修銀五千兩內報銷。○又題准
捕河通判所屬三洞橋。改為五洞橋。○三十三

年開它憲化縣徒駭引河。○又奏准加河廳屬
滕縣汎內。劉昌莊通湖水口一道。原寬二十八
丈。係分洩彭口山河異漲之水。以達於微山湖。
每逢伏秋汎發。水口汕刷過寬。致湖河相連。有
礙漕艘緯道。其每年修築草土夾壩。搭蓋木橋。
不能經久。應於水口中間。增建減水石牕一座。
○三十四年題准。堂邑博平二縣之堂博汎運
河西岸進水牕。移建迤南馬頰河頭地方。金門
展寬五尺。牕門面加高一層。以資宣洩。○三十
五年奏准。運河廳屬南旺湖土地廟前。增建石

牐一座。○又覆牐濟甯等十四州縣。濬出新泉
四十九處。堵塞舊泉二十六處。○三十七年奏
牐補修運河。加河二廳屬單牐水口。並排椿碎
石。以資蓄洩。而固緯道。○四十一年。拆修加河
廳屬珠梅石牐。並築攔河壩一道。○四十二年
奏牐蜀山湖永安永嘉二斗門。改建二洞橋座。
加挑引渠。以資收蓄。並於湖坡上。培築攔水土
埝。增建二洞橋牐。其沿湖圍隄。原有埽工處所。
改砌碎石坦坡。○四十六年奏牐運河加河二
廳屬。自濟甯以南至黃林莊。東西兩岸。均修緯

道運河廳長五千七百八十八丈。加河廳長二千七十丈五尺。○四十七年奏准挑挖加河廳屬嶧汎伍家河。又於工尾工頭築夾壩四道。並拆改河內萬年花山石橋二座。○四十八年拆修濟甯州城東楊家壩。並接長雁翅。○四十九年拆修運河上河廳屬永通戴灣二壩。○又挑濬武城鉅野之萬福河。金鄉之柳林河。○五十年疏濬金鄉魚臺濟甯鉅野各州縣幹河。○五十一年興挑李六口土山引渠。並幫培隄壩。○五十二年挑挖南陽昭陽微山等湖引渠。○又

奏准趙王等河新挑工程。今該督撫飭各該州縣隨時巡察。如有淤淺之處。加意疏濬。儻不實力奉行。致有淤墊。即將該州縣叅奏。照河工隄岸豫先不行修築例。降一級調用。兼轄官罰俸一年。捏報挑濬者。州縣革職。兼轄官降一級。○五十四年議准。館陶縣境內衛河與漳河合流。濟運衛河東岸有隄。而西岸漳衛毗連之處。向無隄堰。每遇漳水漲發。泥沙平漫入衛。易於淤墊。茲於衛河西岸築夾隄一道。長七百二十丈。俾漳水順隄下趨衛河。不致淤墊。以濟漕運。○

五十五年。修築濟甯州南門橋石工。以資鞏固。
○又上河廳屬運河東岸。修築減水壩一座。
○又汶上縣汶河上源。修築滾水石壩一道。○五
十七年。挑挖徒駭馬頰趙牛小支沙河。並四女
寺哨馬營支河。○嘉慶六年。上河廳屬挑挖通
濟牕東岸月河一道。捕河廳屬挑挖戴廟支河
一道。○七年。上河廳屬聊城汛周家店牕西岸。
挑挖月河一道。○又挑挖李務海牕西岸月河
一道。開挖堂博汛魏灣壩北口涵洞外引河一
道。○又上河廳屬挑挖臨清汛甌牕上月河一

道。○又運河廳屬挑挖濟甯州汎趙春牐月河一道。○又挑挖恩縣四女寺支河一道。長二千七百十八丈。○十三年

諭四女寺支河地處臨清牐下游。為漳衛二水盛漲時宣洩去路。所有應修工段。現據勘估動項挑挖修築。應即認真經理。毋任草率偷減。虛糜公項。至該河每屆冬季應行挑濬淤淺。亦當籌款備用。著照所請。於該省司庫城工生息銀內。提取十萬兩。發給山東運司。交與殷商生息。為每年冬間勘估挑濬之用。○十六年。疏濬泗水分支府河。並濟甯州護城河。長

一萬四千六百一十七丈。○十九年奏准泰安
兗州沂州各屬泉出成池。達為渠。匯為河。應實
力疏濬。以濟漕運。○二十二年。挑鄒縣橫河下
游河口。雞心灘。導水西行。俾復故道。○二十三
年

諭。陳預奏東省小清河。以章邱鄒平長山新城為上游。
高苑博興樂安為下游。現自章邱山頭店至萬家口
止。計河長六十里。水流無滯。自萬家口至段家橋。正
河淤墊。又鄒平之王家橋。開河橋。鄒長交界之郭家
口。高博樂三縣之支脈溝等處。淤墊較厚。均須逐段

興挑尚有萬家口灰壩及宋龍口孫家橋一帶應開
段興挑及均張壩以東之小清廢河亦宜疏導並將
淄河門口以上海灘挑挖應照舊章各就地方自出
民夫興辦惟又據高博樂三縣民人呈訴以上游宣
洩水勢全行下注支脈溝不能容納恐致漫漾查上
游之許山泊清沙泊麻大湖係潯水之所應先將二
泊一湖挑挖寬深使水有停頓再挑挖支脈溝並將
舊有隄岸補築以防漫溢次將上游之段家橋等處
次第疏通再由陶唐口正河通至均張壩牆門由支
脈溝入海則上游章邱等縣民人樂從襄事下游高

博樂三縣居民得水有歸宿。攔禦有備。亦無虞其堅不興挑等語。小清河水漫溢。固由下游不能宣洩。亦由上游河道淤墊所致。因勢利導。先將上游疏濬。並將許山等二泊一湖挑挖寬深。足資停蓄。則水勢自不致建瓴直注。下游高苑等縣亦不驟虞漫溢。著陳預即照所議先行出示曉諭。俾上游居民樂於從事。其下游居民亦以次將海灘挑挖通暢。使水有所歸。不至偏受利害。○又奏准。滕嶧二縣泉務。令佐貳官分管。以專責成。滕縣以地方縣丞為專管。嶧縣以河工縣丞為專管。均以知縣總理。○又挑濬

四女寺支河。與直隸省各按地段一律疏通。○
二十五年議准。利津縣為全黃入海之處。接連
城東南舊石壩。於南關加築土壩。長三百四十
丈。裏面加幫縷隄。東關加築土壩。長一百丈。石
壩以下迤北至宴家莊築土壩。長三百八十丈。
加高培厚。○道光元年。修築蘭山。郟城。沂河缺
口馬頭鎮土隄。○三年。修築壽張縣運河西岸
民埝。計長一百七十丈。○又修築臨清館陶武
城三州縣民堰漫缺十七處。○四年奏准。四女
寺支河。間一二年。委員查勘奏辦。毋庸專交地

方官歲修。○八年挑濬恩縣德州境內四女寺支河。宣洩漳衛之水。拆修攔水挑水各壩。補築德州牛角隅北岸隄堰。就南岸截灘取直。以資宣洩。○十一年修運河。加河泉河三廳牐壩。○十二年修恩縣境內攔水挑水等壩。○又修運河。上河兩廳橋牐石工。○又修運河。上河下河。加河各廳土石埽工。並減水牐座。○又修加河捕河上河三廳牐。○十四年

諭吳邦慶奏詳議查泉章程以備蓄水濟運一摺。東省運河本無來源。全恃引泉蓄蓄。泉河通判現准復設。

查泉事宜。自應酌定。據該河督妥議各條。朕詳加披閱。內泉務宜遵舊例。責成道府兼管。山東有泉十七州縣。非泉河通判所屬。嗣後仍責成兗沂曹濟道兗州沂州泰安各知府兼管。就近督率各州縣實力妥辦。並令隨時抽查。於泉務更為有裨。其地方管泉佐雜等官。除東平州同甯陽主簿嶧縣縣丞。向歸運河道廳管轄外。其濟甯州同。泰安沂州二府經歷。汶上鄒縣滕縣泰安滋陽各縣縣丞。及新泰縣巡檢。著照所請。俱歸泉河通判管轄。所有管泉佐雜十二員。嗣後均責成該廳於春秋查泉時。察其勤惰。分別功過。

該河督會同巡撫三年覈計。始終奮勉。優加鼓勵。始勤終惰者。歸入甄別。辦理其廢弛不職者。隨時撤參。

○十年挑濬東平州境小清河。暨安流龍拱二河。○二十年修築濟甯魚臺汶上壽張四州縣湖河民埝。並蜀山湖水櫃。○二十一年奏准濟甯州境楊家牐。攔束諸水入馬場湖。牐上泊岸長二十丈。東西岸土堰長四十丈。一律改為石壩。○二十二年奏准鄒縣橫河口決三百二十丈。沙淤成雞心灘。先於河北首開引河一道。築挑水壩三道。挖雞心灘背。使水趨引河以殺溜。

李家河決口一百七十丈。挑順水正河。添築挑水壩二道。以資抵禦。○二十七年。堵築濟甯東平等處衝決民埝。並增卑培薄。蓄濟運。○二十八年。修築汶上縣南旺湖埝工。六千六百九十九丈。東阿縣張秋鎮運河西岸埝工。一千三百六十七丈。○二十九年。修築濟甯州嘉祥縣臨清衛境內埝工。○同治三年。奏准山東省黃水漫溢。濮州地居頂衝。補築開州至張秋鎮金隄一道。以防黃水東趨。○十二年。築濟河北岸新隄。○又疏濬南旺湖。並修復西北隄。○十三

年。趙王河北築長隄。南修民埵。並月隄一道。○
光緒二年。泗河自張家灣至泗河口二十餘里。
新河及白馬河入湖十餘里。一律挑挖深通。○
四年。修理臨清州舊城水門圈洞。培高大營尖
冢兩莊隄身。添築滾水草壩。挑挖引河。以洩衛
河盛漲。○七年。八里廟黃運口門下游之陶城
埠。開新河千二百丈。並挑阿城迤北運河。○九
年。疏導小清河入海。○又修築東阿齊河。歷城
長清濟陽鉅野青城。利津惠民。各該縣民埵。加
修套隄。並添築埽壩挑水壩。○十年。修築德州

境內運河兩岸隄工。並加修月隄。

山西○雍正九年議准太原平陽汾州三府同知。令其兼管水利。將太原等各府所屬渠道。飭令水利同知。每歲於農隙時。親詣所屬地方。不時詳察。儻有應增渠道及修築之處。即勸導有田各戶。按畝出力。貧富維均。其大同等府州所屬渠道。照舊責令地方官一併稽察管理。○乾隆四年。修築陽曲縣西門外被衝護城隄堰。○六年奏准山西省北護城土堰。每年六月中水發。大溜直抵土堰。酌議每年歲修銀六百兩。交

陽曲縣豫為辦料。於冬春水涸之際。培築土堰。其餘物料。豫儲河干。一遇水發。緊工。資以搶修。年終造報查覈。○十年議准。文水縣永樂等三鄉。去年夏間被水淹漫。築堰一道。工長二千一百六十五丈。○又覆准。晉省水西門外護城堤。堰兩旁種樹。俾根深盤結。以資鞏固。○十一年。疏濬臨晉猗氏。聞喜安邑。夏五縣涑水河道。臨晉猗氏。二縣。建分水石牕一座。隄下建砌涵洞一座。○又修理垣曲縣護城石隄。○又疏濬省城牛站門外壕渠。○二十七年奏准。夏縣白沙

河南北兩岸。改建石工。○四十年奏准。平陽府城壕地畝。永行禁止耕種。俟來歲春融。挑挖深通。即將所挖之土。培護城根。以資鞏固。○四十七年。開濬榆次縣部邨弓邨渠道。○道光二年。修築河東鹽池四鋪至七鋪隄十餘里。○三年。重築河東姚暹渠新堰。並修李綽堰。暨五姓湖渠堰。○又奏准。河東鹽池隄堰工程。歲修不得過一萬兩。○又修築省城西門外護城土堰。挑挖引河。○九年。

諭。徐忻奏勘明文水縣境內文峪河情形一摺。文峪河

由山西文水縣西北發源。河流遷徙靡常。兩岸居民。皆思豫防水患。修築隄堰。往往滋生事端。現據該撫查勘情形。勢難就地開挖。並恐既開之後。旋復淤塞。現在新走之河。由武陵營西城東莊等邨入瓷窯河。下達汾河。極為通順。自應順水之性。毋遇來源。暢水之流。毋阻去路。著照該撫所議。責令該縣相度地勢。或切灘逼溜。或督率疏濬。酌量辦理。其各邨所築護邨隄堰。藉以防禦。仍聽其便。惟各須距河二三十丈。不得攔河堵築。致阻去向。仍令該管道隨時稽查。以杜紛爭。而資捍衛。○又修築五龍堰八百九十餘丈。

○十三年修復姚暹渠。責成監掣同知解州知州承修。保固三年。限內衝潰。即令賠修。所借商捐銷價生息銀兩。由坐運兩商四六攤捐歸款。○十五年議准東河鹽池歲修。每年額定銀萬兩。在坐商交納道庫銀。及商捐銷價生息銀內支銷。○十六年奏准姚暹渠自安邑之迎渠橋至虞鄉之棗圪塔橋間段挑淤。並修培隄堰。○咸豐八年重修運城東池場外石馬道五百餘丈。並開引河。築石堰一道。○光緒十二年奏准汾水衝毀城垣。勸民捐築。並修隄堰城垣滿營。

等工。

河南○康熙十二年。修復安陽縣萬金渠。引洹水灌田。○雍正四年。開拓輝縣百泉東西民渠口門。以資灌溉。洹河自石橋第十洞處。每歲築石子壩。開渠引水。其西三十三洞。盡行疏濬。○又覆隄。小丹河上下。開闢秦渠董下渠。各建分水渠口灌田。小丹河內。舊有分灌民田之十六口門。盡行堵塞。○五年。疏濬安陽等縣各泉源。幫砌石岸。輝縣百泉池南。建設斗門。築堰建牐。並疏濬各泉。以資灌溉。又疏濬萬泉寺泉源。獲

嘉縣開挖丹河。河內縣上秦渠進水口門。改建石牐。並疏通東西民渠。建小涵洞。修武縣開闢丹河。○乾隆二年

諭。朕聞河南省之葉縣西平遂平襄城郾城等縣。今年皆遭水患。蓋緣河南地土平行。河流不能盈尺。雖有去地二三丈者。究竟與地勢相平之處居多。且向來渠道率多淤填。是以一遇山水驟發。不能宣洩。廬舍田禾。盡遭淹漫。著委官踏勘。悉心計議。將如何疏導河流。加增隄岸。以防洪水漫溢。妥商定議辦理。欽此。

遵

旨議定。培築郛城縣沙河隄工四段。葉縣沙河隄工一段。及西平縣洪河隄工。濱河貧民。寓賑於工。○又修築鄭州中牟縣賈魯河河道隄堰。自張家橋迤東乾柴李家莊等處至新河口。隄長二千二百八十二丈。加培民堰。增築圍隄。○又覆准嗣後豫省應修水利地方。如有工程重大。動用帑項修築者。承修各員。果能實力辦理。修築堅固。錢糧並無糜費。俟工程完竣。保固三年之後。令該督撫將該員功蹟。覈實造冊。題請交部分別議敘。至專轄監修統轄督修之員。果能督率

有方各屬內毫無怠忽。照河工秋汛平穩之例。量加議敘。至承修之員。如有膜視悠忽。不先期修築。一遇水發。即致田畝被淹者。照河工隄岸豫先不行修築例。降一級調用。專轄兼修之員。罰俸一年。統轄督修之員。罰俸六月。儻有虛冒錢糧侵蝕入己。以致工程不堅者。將承修之員。照侵欺河工錢糧例。嚴叅革職治罪。該管各官徇隱不報。照徇庇例。降三級調用。○三年。修築汲。淇。滑。湯等縣河隄。彰德府城壕支河。安湯二縣。麥河。以工寓賑。○四年。

諭。今年六月。豫省地方大雨如注。川澤交盈。分洩不及。開封等屬被水之州縣甚多。朕心甚為軫念。已屢降諭旨。多方籌畫。賑恤撫綏。因思濟飢拯溺。目前之補救維殷。而陂澤河渠。善後之經營宜亟。豫省地方有淮潁汝蔡諸水。經緯其間。凡舊有河道。皆達江湖。第因故道被淹。無支河導引。是以水無容納之區。勢必旁溢。下有壅塞之處。滂即難消。聞現在撫臣檄令各屬勘估興修。但愚民無知。上游方事疏濬。而下游填實阻隔。仍致水無去路。於事何益。著細心熟籌。專委管理河道明晰水利之大員。親勘全局。通盤計算。務

使一概疏濬深通。毋令各分疆界。稍有阻滯。再豫省之賈魯河。原由江南地方全注入淮。是廬鳳等處。即豫省之下游也。此時現有欽差大臣興修廬鳳河渠。亦當同為留意。從來疏濬河道時。上游十分用力。下游百計阻撓。各處人情如此。不獨豫省為然。是在封疆大吏洞悉其弊。毋為所欺。庶幾原委暢流。永無泛溢之患。可將朕旨。即行豫省。並有河道之各省督撫知之。○又覆准豫省興修水利。疏濬河道。自杞縣交界。下連柘城。淮甯鹿邑之永利溝。老黃河。舊河故道。一概深通。河土分堆兩岸。以資攔束。○五

年覆隄。乾河涯乃汴河故道。與城濠相通。下至紅沙灣。入於沙河。應開通以消省城積水。並建砌輒溝。石橋石牕。○又議隄。豫省地高。居江南之上游。開封以南。祥符等沿河七州縣之水。皆歸渦河。綿長四百餘里。逾亳州蒙城。抵懷遠縣。匯入於淮。開濬賈魯新河。入淮之水分洩入渦。賈魯河北岸中牟縣四十五里鋪。建設石牕。中牟。祥符陳留杞。睢。柘城。淮甯鹿邑等八州縣。開濬河道。並築攔水壩。以分其勢。渦河南岸分流。漳河一道。宅濬乾溪溝。以為容納之區。渦河經

由亳州城北改石橋為浮橋以暢河流庶江豫
兩省可無漫溢之患咸資灌溉之利。八年疏
濬永城鹿邑淮甯西華等縣河道增培隄岸以
資堵禦。十五年奏准豫省惠濟河分減賈魯
河異漲之水宣洩各州縣溝坡雨水酌取濬河
之土加增大隄停築子堰酌留口門用石包裹
以防暴流刷汕。二十四年議准永城縣洪溝
河長二十五里東西兩岸隄堰共長五十里由
居民內揀選殷實歷練之人按五里設堰長一
名共堰長十名立定界限責令防守以該縣丞

為專管。該縣為統轄。該府糧捕通判為兼轄。○
二十七年。修濬中牟縣境內賈惠二河。○二十
九年。惠濟河石壩改建石牐。○三十九年。奏准
安陽縣境內高平牐。每年四月初五日起。至五
月十五日止。下板堵閉。俾洹河全流歸衛濟運。
過此開牐。聽從民便。○四十四年。挑濬惠濟河。
○五十年。挑挖賈魯河。自鄭州京水起。至中牟
縣長湖橋止。又自祥符界至扶溝縣雙泊河止。
共長三萬九千四百八十六丈。○五十二年。挑
濬陶北河。○五十八年。培築河內縣馮家莊沁

河民堰挑挖引河長一千一百十六丈。○嘉慶

十五年

諭恩長奏酌籌疏濬漳衛河經行要口以資濟運一摺。
據稱內黃縣為漳衛兩河經過口門。向因漳水挾沙
壅滯。豫省有漕州縣及長蘆商人略加挑挖。未能寬
深。次年漲水仍不能容納。擬於春秋兩季大加疏濬。
等語。漳水近來形勢北高南下。入衛故道既難歸復。
而兩岸俱係浮沙。又非築隄所能堵禦。且河道綿亙
數百里。於墊日高。即耗資數十萬。築壩挑溝亦不能
即收實效。殊於蘆鹽豫漕有礙。著照所請。即於內黃

縣之南豆公北豆公一帶口門遶委熟諳工程之員。於每年春秋兩季妥協經理。務使工歸實用。毋任浮冒。所有挑費銀八十餘兩。著即著落豫省有漕州縣。並長蘆鹽商。分為鹽六漕四攤捐辦理。○十七年。修築河內溫孟等縣城隄。○二十三年。修築武陟河內二縣沁河兩岸大隄。及武陟縣攔黃隄。○道光三年。

諭戴均元等奏會勘漳河漫口。迪下情形。設法籌辦一摺。治水之法。合則為惠。分則安流。漳河性本湍悍。自乾隆五十九年由三臺邨南徙合洹以來。衡水為其

頂阻漳與洹每值夏秋同時異漲民堰不能捍禦以致安陽內黃迤下各處頻年衝決此合則為患之明證茲據戴均元會同程祖洛前往周厯履勘衛水由袁邨迤東衝刷成河經百六十餘里至大名縣之岔河嘴而後與漳合洹水復由原路獨行百餘里至楚旺而後與漳合現在漳河北徙雖無一定河槽業已分殺水勢自當為因勢利導之計著照所請於樊馬坊馮馬坊陳家邨湘河河幹各處北岸支流築做柴壩堵截使河幹迤上分流歸併一處田市北岸水高南岸一尺有餘即就高灘挑挖引溝一道俟漫水稍

涸。再將辛莊一帶漫灘之水。勘明築壩堵閉完密。以資直隸大名等處捍衛。其梗阻河心之田家營等十處。南北兩岸迎溜處所。編設柴壩以護民居。北岸上游商家邨孫陶集兩處。壩工卑薄。即飭鑲修高厚。加築挑壩土格以期穩固。自柴邨橋起跨壓新淤河形。接連洹河北岸民堰。建築土堰一道。再將舊民堰培厚加高。樊馬坊迤下南岸王家口。做築土格土壩。以免串流南趨。使漳洹不致再合。所需工料。著程祖洛飭勘確估。設河勢再有變遷。現在擬辦工程。有應量為增減者。隨時奏明辦理。一切經費。先由司庫借項。

興修事竣攤徵歸款。河身所占地畝應徵錢糧。即飭地方官查明照例題請豁免。○又

諭

戴均元等奏會勘新刷衛河一摺。前因內黃縣袁邨地方將地畝刷成河形。現在鹽運商民各船均改從新河行走。經朕特派大學士戴均元會同程祖洛將有無妨礙之處詳加查勘。茲據奏稱衛水向係經賁公河下注。因漳水挾洹而來。將衛水頂阻。旁決袁邨。今漳水業經北趨。改由慶豐莊歸入正河。其實公河上游止係洹水。較前此漳洹合流衝衛情形迥異。衛水自袁邨決口。刷有河槽。則漳衛分流。輕減水患。實

有可乘之機。自應通籌全局。開治新河。惟衝刷處所。間有淤淺。兩岸亦恐旁溢。應行挑挖深通。並築隄捍衛。一併相機妥辦。其瓠子嘴東岸溝形一道。偶遇漲水。即由龍王廟地方歸正河。著於該處築鉗口壩。夏開冬閉。以備宣蓄。惟內黃縣東境袁邨等邨。漫水穿邨行走。居民難免浸灌。著於東袁邨大晁邨疏濬支流。將邨口正流堵塞。其大社邨之水。無支流可引。著於該邨前後築隄捍衛。旁溢支流。悉行堵閉。使全流俱歸正河。所有新河經由處所。除直隸境四十餘里。黃河故道本無錢糧外。其餘行糧民地。久經水衝沙

壓雖未咨請豁免。而歷年錢糧多係緩徵。著自道光三年為始。將河身所占地畝。應徵錢糧。並前此歷年緩徵錢糧。均確查題請豁免。其築隄占用民地。亦著照公占地畝。給予地價。工程經費。現據該商等呈請捐輸。著直隸總督長蘆鹽政會同程祖洛委員確查籌辦。俾衛河久遠暢行。以奠民居而利商運。○又築蘭陽縣護城隄。○七年。疏濬滎澤縣索須二河。○八年。疏通湯河入衛故道。○又南陽府城東南白河。築碎石磨盤壩十六道。土壩三道。浙川丹江東岸。築碎石磨盤壩十道。○又修築沁河

兩岸隄工八十四段。○九年。濬蘭儀縣城濠。安設吊橋涵洞。郾城縣西護城石隄決口。改築碎石坦坡出水。以衛城垣。○十年。修築睢州護城隄。○二十二年。接築孟縣護城新隄九百八十八丈。○又於武陟縣沁河兩岸加築子堰。添築新壩。○二十四年。祥符縣境劉寺支河。鑲築攔黃埝壩。○二十五年。疏濬賈魯河身。洩鄭州滎陽一帶山水。○二十九年。修築武陟縣沁河隄工。○咸豐二年。修築河內縣沁河隄工。○同治六年。疏濬夏邑縣境內響河。與永城縣毗連之朱

家橋入巴溝河。又由巴溝河南岸東大橋之下。開濰河口門。至杜家營。另挑新渠入白洋溝。以資宣洩。○光緒四年。挑挖省城城根堆積浮沙。以工代賑。○五年。修復衛輝縣境之峪河。築紅石堰。並護壩一道。○八年。奏准賈魯河淤淺。於朱仙鎮西八里之王堂。挑挖新河。○又奏准河南省河渠。按照邨莊設立渠長。如有淤墊殘缺。責令隨時報官集夫督修。河南地畝。向無田閒水道。應就地形較窪之處。開橫直溝渠。州縣官於農隙時。督令開挖橋涵洞。責令渠長經管。

報官修築河邊種葦及設斷捕魚有妨水路者
率渠長查禁盜挖隄缺洩水者嚴拏重究。又
奏准歸德府屬巴溝洪溝二河每歲十月農隙
由江南河南二省各派道府大員會勘如有淤
墊即督率本地民夫照界挑修儻犬牙相錯有
須工作並舉者立即詳咨會辦。

欽定大清會典事例卷九百二十七

工部

水利

江南一

江南○順治十七年。修築當塗高淳二縣廢圩。更名忠惠圩。令有司不時培護。○康熙十年。開蘇屬劉家河。松屬吳淞江。以洩太湖。俾由故道入海。○十一年。濬蘇屬吳江長橋一帶。以洩太湖水勢。○十九年。疏濬蘇常二府屬白茆港。孟瀆河。築壩建牯。又修七丫河一帶。並開福山港三丈浦諸河。○二十一年。濬蘇屬支塘至新市。

舊河。仍令歲修蘇松河道牘壩。專責蘇松常道
管理。年終報部。○三十三年覆准吳淞水利飭
令江水經由地方各官。每年於秋冬水涸時各
加疏濬。不致上游泛溢。○四十七年。疏濬蘇松
常鎮所屬支河港蕩。修建新舊牘壩。以資灌溉。
○四十九年。濬徐邳境內房亭等河。○雍正五
年。

諭。地方水利。關係民生。最為緊要。如江南戶口繁庶。宜
更加修濬。時其蓄洩。以防旱澇。向來屢有條奏之人。
但未經本省督撫奏請。朕意亦久欲興修。以資農務。

因海塘工程正在營治。且水利事關重大。必得實心辦事之人。方有裨益。我

皇考念切民依。周知稼穡。因康熙四十六年巡省江浙。所至必細驗水土燥溼高下之宜。詳考五穀種植之性。躬親講求。將附近太湖及通江潮之處。條分縷晰。特頒

諭旨。令江浙督撫於蘇松常鎮杭嘉湖地方。疏濬河港。以資灌溉。修建牯壩。以便啟閉。皆用公帑。不使絲毫出於民力。思至渥也。乃當時督撫諸臣。不能仰體。惟以虛文奉行。糜費帑金二十餘萬。飽官吏之侵漁。而

無實效。朕即位以來。事事仰體

皇考之貽謨。永圖民生之遠計。據該撫陳奏。應是地方不可緩之事。凡建立牐壩。疏濬河流。務期盡除淤塞。以杜泛濫之虞。廣蓄水泉。以收灌溉之益。其一應公費。皆動用庫帑支給。一切工程。交與該督辦理。現在部屬及候選部屬府州縣人員內。有具呈願往效力者。選十數人。帶往江南。不必令出貲財。惟令辦理事務。酌量委用。○又

諭。朕軫念民依。以蘇松地勢稍下。特遣大臣會同督撫。開濬水道。為久遠之計。太湖之水歸海。劉河白茆二

河為要。必徑直深廣。令水暢出。方能一勞永逸。圖誌所載。二河形勢。數十里一徑直趨入海。無少曲折。因年歲久遠。海口為潮淹塞。悉成平陸。太倉常熟之紳衿土豪。霸占耕種。報科者十無二三。今既開濬。務必盡去新漲之地畝。以復故道。聞懷私利己之徒。投遞公呈。或請別開支河。或請別開新道。其言紛紛不一。儻以似是之言。或惑於聽聞。或希圖微利。或稍徇情面。或依違遷避。使積水不能暢出。數年後仍漸致壅塞。則汝等罪不可逭矣。當秉公詳勘。務為一勞永逸之計。○又

諭江南水利緊要。須實力奉行。務期有濟。朕思牘工自
須辦理候時。至於疏濬河渠。無須等候。先將要緊應
濬河渠。即行酌議。乘此春夏交接之時。速行疏濬。毋
致誤農。大凡作工之處。多係就食貧民。毋令姦徒包
攬。欽此。遵

旨。勘得蘇松常鎮水利。並藉太湖以為吐納。西北承宜
興。荆溪百瀆之水。西南承杭湖苕霅諸山溪之
水。而皆由三江以入於海。一自吳縣之鮎魚口。
經蘇郡之婁門會城諸水。逾崑山至太倉之劉
河。出天妃牘入海。是為婁江。一自吳江之長橋。

出瓜涇港。由龐山河經長洲崑山青浦嘉定。以至上海。合黃浦以入海。是為吳淞江。一自白蜆港過澱泖湖。會浙省杭嘉諸水入海。是為黃浦江。實太湖之尾閭。關七郡之休戚。疏其下流。使水有所宣洩。自不至泛溢貽害民田。○又議准吳淞天妃二牐。各設牐夫二十名。白茆牐設牐夫八名。徐六牐設牐夫六名。九曲得勝孟瀆三河三牐。各設牐夫四名。責令經管官夫敬謹看守。至徐六牐照浙江三江牐之例。豎立水則。驗水消長。隨時啟閉。儻該管官夫受賄徇情。啟閉

不如法者。將該管官指叅。○又議准。禁止河道
壅滯。河濱新近攤占田地。其無礙河道者。聽其
自便。其濱河居民架水板房有礙河道者。坍塌
之後。不許再行修造。至濱河未報升科之新漲
地畝。並越砌石礪實係妨礙河道之處。皆令速
毀。如有不肖紳衿。以及土豪藐法抗違者。令分
管水利各官。詳報該督撫。

欽差水利大臣。會同題叅。照例治罪。若水利各官失
於稽察。或通同受賄。縱容擾累。該督撫即行糾
叅。分別議處。○又議准。水利同知通判縣丞主

簿等官。各兼水利銜。在府屬河道並牘內外不
時巡察。於農隙時督率疏濬。又江常鎮道蘇松
太道均兼水利銜。以便督率。○又議准唐家壩
舊存牘基。復建為牘。唐家牘旁南北陳家二壩。
改作涵洞二座。務期灌溉有資。○又議准江南
省開濬河道所用土方。照漕河定例。濬河之土。
四面各闊一丈。高一尺。為一方。給銀九分。積高
一丈。為一大方。給銀九錢。○六年議准一切支
河溝港淤淺。水難存蓄。令水利官於農隙時勸
諭盡力疏濬深通。以資灌溉。○又議准吳淞天

妃七浦三牐。各設牐官一人。白茆徐六涇二牐。共設牐官一人。均令河道總督於河工效力人員內選補。九曲得勝孟瀆三河牐。交與該縣縣丞就近管理。又開濬揚屬烏塔溝槐子河界河車路海溝伍佑場王家港牛灣秦城以東各處淤淺。以資灌溉。○又議准劉莊青龍橋改為石牐。鮑家壩運鹽河建築土隄。鹽城石噠口天妃口廖家口草堰口。如皋苴河洋黃沙洋各增建石牐。董家溝徐家涵等處建設涵洞。以資宣洩。○又修復吳淞江陳家渡漫工。建築夾壩。○七

年

諭疏濬山東濟甯嘉祥等縣及江南徐沛等州縣水道。使歸宿於海。山東江南二省向來被水之州縣。皆成樂土。朕思此項工程。既於民生大有裨益。則舉行不宜稽遲。應先委官前往。專司督修之事。以便備辦物料。早動工程。○八年議准。串場河道王家港新洋港牛龍港草堰口。廖家港五處積沙。照吳淞白茆等海口之例。用犁船犁鬆。用混江龍。按時疏濬。○又議准。泰州興化縣所屬各鹽場。適中之東臺地方。設立水利同知一人。統轄泰州興化縣

所屬串場河道。並各處牯壩。每遇疏濬海口之時。令同知督率牯官牯夫。啟閉。雇覓水手人夫。乘迴潮之勢。用混江龍。挖刷。務使海口通暢。○十年議准。如皋之岔河。以北至豐利場。二十八里。岔河以東至掘港場。五十里。各就淺深分段增濬。俾蓄水五尺。以利運行。○又議准。如皋之力乏橋。至泰州。并茶場鹽河。濬深蓄水五尺。開濬白駒草堰等場河道。並揚州府城內之城河。城外之繞城河。一概疏通。○十一年

諭。江南范公隄。為沿海之藩籬。鹽場之保障。原係商人

捐修工程。聞現在殘缺甚多。急應修築堅固。現據兩江總督委官確勘料估。著一面具題。一面作速興工。使沿海窮民得以傭工餬口。但工程綿遠。需大員督率料估。悉心查辦。○又

諭。據奏江南通州所屬范隄。殘缺之處。業已修築完竣。所有庫發工價銀。各場竈總感戴國恩。情願急公效力。悉已繳還運庫等語。朕允從江南總督等之請。發帑修理范隄。原係保護鹽場加恩竈戶之意。其工費銀何用竈總捐輸。著出示曉諭。照數給還。毋使不肖官吏人等侵蝕中飽。○十二年。修補泰州屬之柘茶

地方舊隄。移進三四里。別築新隄。如皋縣屬之
豐利掘港馬塘。通州屬之石港西亭。餘西餘中。
餘東呂四。及泰州屬之丁溪草堰。興化縣屬之
白駒劉莊。鹽城縣屬之伍佑等場。范隄。並令鑲
築防風。○又議准范隄緊要之處。計程三百五
十六里。照黃運湖河之例。每里設堡夫一名。共
三百五十六名。令其朝來暮返。每日擔積土牛。
修補殘缺。責成各該河員稽察。○又議准范隄
照黃河隄岸成例。隄頂修開車道埠口。責令場
官督率附近商民。隨時培補。○乾隆元年

論三代以前不言水利。溝澮之制。時蓄洩。備旱澇。尚書周禮所載。為田功計者。其利甚溥。開渠引水。溉田育穀。始於戰國。蓋因阡陌既開。溝澮尋尺。已失其舊也。歷代言水利者。得失參半。總以相土宜。順水勢。近不擾民。遠可利人為主。今江南所屬蘇松常鎮四府太倉一州。現在興修支河。仿河工海塘之例。督撫分委降革廢員及本籍候選考職人等效力承修。朕思渠港圩壩附近溉田。原宜開濬。以備旱澇。但開濬之法。須河身深廣。蓄洩得宜。其它取塗泥。遠移他處。或培窪下之地。或築隄岸之上。方為久計。若雇夫取土堆

貯河旁。雨淋水潦。旋即入河。不久淤塞。務名無實。徒滋煩擾。至古隄舊渠。儻遇旱澇。不為田害。便宜仍舊。紛更改築。甚無謂也。今蘇松等處內地支河。原不比河工海塘之險。古隄舊渠。如元和致和等塘。民利往來。田資灌溉。至今受益。吳本澤國。三江震澤。支流四溢。如邱與權。單錡。邨。宣。趙。霖。夏。原。吉。周。忱。等所論水利。考據精覈。得失瞭然。今效力人員。相度形勢。諳練自遜前人。儻有夾塘蓄水。石渠洩河。止宜加修。不必改築。若有必應開濬建築之處。督撫留心細勘。並飭州縣協辦工程。一應調遣。臂指易使。至常州等州縣。

按畝科錢以供大修。朕已降旨停止。儻有官吏藉端中飽。即絲毫擾累。經朕訪聞。必嚴加議處。嗣後督撫以至州縣。建言為民興利。或利小而害大。或利在目前而害伏於後。或有利無害而其事易創難成。皆宜詳審熟籌。慎之於始。以體朕惠養元元之至意。○又論。史書詳誌河渠。經術兼明水利。誠以國計民生所關也。果使水道疏通。脈絡流注。陂澤非沮洳之藪。隄防有蓄洩之方。旱潦有備。而田廬無虞。其有裨於閭閻。誠非淺鮮。我

皇考軫恤黎元。興行水利。凡直省泉源河湖。莫不濬導。

俾民得以灌溉。轉瘠為腴。至於蘇松之太湖。吳淞白茆。劉河歸海要道。並淮揚之槐子烏塔河。泰州如皋。運河串場車路海溝等河。尤不惜帑金。專員督理。將各河故道。或為豪強侵占者。

諭令嚴察清出。始得一一開通。建插築隄。按時啟閉。使近水田畝。均霑膏澤。貨船鹽艘。通行無阻。利賴甚溥。但自開濬以來。已閱數年。圩岸不免坍塌。沙泥不免淤積。朕思與其歲久濬築。事難費倍。不若逐年疏葺。事易費省。著江南督撫暨河道總督。令管理水利河務各官。及濱河州縣。各於所屬境內。相視河流淺阻。

每歲農隙募夫完濬定為章程逐年舉行必令功施可久惠濟民生毋得視為具文玩誤工作及陽奉陰違絲毫擾累○又

諭朕聞揚州府儀徵縣江口至江都甘泉二縣所轄三又河一道共計六十餘里為通江達淮要津向例三年大挑一次撈淺一次共需銀一萬六百兩是皆商三民七分派捐輸經管里甲不無苛索需擾而承修各官又復層層侵扣以致撈淺挑濬有名無實無益於工程有累於百姓嗣後著將商民派捐之項永行停止亦不必拘定三年之限如遇應濬之年著該鹽

政委員確估。實力挑濬。所需工費。即於運庫一半充公項下動支。毋得虛冒侵肥。草率塞責。○又議准。串場河新建並原有石牯十座。泰州屬小海草堰二牯。歸小海草堰各場大使就近管理。鹽城縣石埭口一牯。歸鹽城縣丞管理。廖家港草堰口二牯。歸新興場大使管理。泰州屬丁溪牯。歸丁溪場大使管理。興化縣白駒南中北三牯。歸白駒場大使管理。二牯。歸安豐司巡檢管理。一牯。仍令泰州興化鹽城三州縣管河佐雜人員。各就本汛河道海口協同管理。小海草堰青龍

噠口四牐。各設牐夫六名。丁溪廖家港二牐。各設牐夫四名。草堰口白駒南中北四牐。各設牐夫二名。又議准王家港新洋港二處。每處設立犁船二隻。混江龍二具。責令泰州州同鹽城縣丞收管。仍令東臺同知督令地方官。每遇奉秋二汎。按日挖刷深通。○二年

諭。自古致治以養民為本。而養民之道。必使興利防患。水旱無虞。方能使蓋藏充裕。緩急可資。是以川澤陂塘。溝渠隄岸。凡有關於農事。豫籌畫於平時。斯蓄洩得宜。潦則有疏導之方。旱則資灌溉之利。非可委之

天時豐歉之適。然而以臨時賑恤為可塞責也。朕御極以來。宵旰憂勤。惟小民之依。是咨是詢。前後諭旨。諄復再三。但化導自在有司。而督率則由大吏。近日直省督撫。惟甘肅巡撫以興水利倉儲為請。西安巡撫亦有勸民鑿井灌田之奏。尚能留心民食。知本計之所當先。其餘能盡心於吏治官方。命盜錢糧諸事者。尚不乏人。而於民生衣食本源。未能切實講求。地方守令。亦惟刑名錢穀。自顧考成。至以愛養百姓為心。留意於稼穡桑麻。如古循吏所為者。蓋不可得。即如直隸今年夏初少雨。深以暵旱為憂。及連雨數日。

尚不甚大。而永定河。隨有漲溢之患。決口至四十餘處。低窪之處。多被水淹。雖因山水驟發。然水性就下。其經行之處。自有定所。設豫為溝渠以洩之。為塘堰以蓄之。自可以分殺水勢。不致為洪流衝突漫衍。如此之甚。是皆平日不能豫為籌畫所致也。東南地方。每有蛟患。考之於古。季夏伐蛟。載在月令。今土人留心者。尚能豫知有蛟之處。掘地得卵。去之則不為害。且蛟行資水。遇溪澗而其勢始大。田疇雖不可移。而廬舍塋厝。尚可遷就高阜之地。以避之。是亦未嘗不可先事豫防。惟在實心體察耳。該督撫有司。務體朕

痼瘼乃身之意。刻刻以民生利賴為先圖。一切水旱事宜。悉心講究。應行修舉者。即行修舉。或勸導百姓自為經理。如工程重大。應動帑者。即行奏聞。妥協辦理。興利去害。俾旱澇不侵。倉箱有慶。以副朕惠愛黎元至意。○又議准。江省各屬濱江近海。湖河交錯。全資水利以濟民生。一切河道。凡閘糧艘往來。及江河湖海要區。專資通洩之處。遇有淤淺。責令水利各官。於藩運二庫公銀。並河庫及藩庫所存鹽規銀兩。動項修濬。其支河汊港。地方官每歲勘明。於農隙時相度勸導。順從民願。疏濬修

築。○又修築蘇屬長洲常熟二縣境內元和塘。
○三年修築松江府婁縣護城石隄。建砌寶應
縣境內西隄柳園頭迎湖石工二百二十丈。○
又修濬安徽省所屬壽州蔡城塘。鳳陽縣山河。
臨淮縣鹿塘。滁州衛黃慶圩。全椒縣張巴等圩。
廣德州秀水壩。桐城縣袁家圩。定遠縣響水壩。
○四年開濬運鹽中河下場河。建築子堰。又開
濬甘泉縣邵伯湖臨湖引河荷包塘及河尾。拆
修寶應縣東岸黃浦壩。○又奏准興修水利工
段繁多。承辦既有先後。竣工亦有早遲。各工告

竣會同驗收。即造冊分案報銷。○又興修淮揚所屬山陽阜甯二縣之魚濱河。興化縣之白駒。插下南中北引河。高郵州之通湖橋馬飲塘河。江都縣之灣頭通河。分司所屬之十場鹽河。通州之黃河洋。范公隄。○又奏准各省民隄民堰。有關於民田廬舍。應行修築。而民力實不能辦者。該督撫豫行題明。照以工代賑之例。動用公項。酌量興修。○五年覆准。天妃廟口。建插一座。拆修白駒三插。其上崗北草堰二插。移建於串場河外口。其餘各插損壞者。分別修葺。以資堵

禦鹺水之患。又疏濬淮陽各屬東塘河道。加幫
范隄。以及耕茶角斜二場隄工。修整揚子橋。牐
底落低三尺。牐之金門。收小修葺。俾得一概疏
通。以資水利。又修築山陽阜甯鹽城江都甘泉
高郵寶應興化泰九州縣河渠兩岸田圩。各高
四尺。底闊八尺。頂闊二尺。以作隄防。○又奏准
上江地方。濱臨江淮。地多山岡。其間鳳陽府屬
虹縣。枯河頭。潁州府屬亳州。乾溪溝。和州。大洋
河。姚下河。牛屯河。含山縣。銅城。牐河。來安縣。龍
尾壩河。均令開挖疏濬。○六年議准。松江府城

西二里涇河。乃黃浦江宣洩要路。一壩橫互中流。急宜開放。設立木柵一道。中留柵門二。量加歲修。○又疏濬句容縣自晏公廟迤東馬鞍山至陳家溝河道。○又修濬海州境內薔薇高橋二河。並薔薇河下尾神州廟後舊石牖。○七年

諭。朕思江南水災之後。賑恤乃一時之補救。而所以安養生民者。全在明歲之農功。自被水迄今。已經兩月。雖水漸減退。不為大害。而彌漲之勢。仍似從前。若疏濬稍後。機宜則今歲田地。斷不能盡皆涸出。小民春耕無望。彼嗷嗷待哺者。何以為生。況此時搭棚棲止。

於長隄者。豈可以久處。亟宜講因地制宜之策。其如
何。疏濬水道。涸出田畝。以安民業。以奠民居。著欽差
大臣河道總督江南督撫妥議。速為經理。○又興修
淮徐所屬各州縣陂塘溝渠圩埂土壩六十二
處。寓賑於工。○又奏准興修淮徐等各府州縣
水利。自淮郡以東。間有從前未經勘明。淮郡以
西。原未議及。興修銅沛二縣境內石林黃邨二
口。沛縣縷水隄田家隄漫口。碭山縣小神湖之
上流及尾閘各河溝。邳州沂水河隄。山陽縣護
城河東隄。接連運河西隄。阜甯縣境內郭墅河

射陽湖等處堵築疏濬。並建設涵洞以資分洩。捍禦。○八年。疏濬泰州河內秦塘港。白塔河。百。汊港。土壩。改建石牯。以時啟閉。○又疏濬板浦。以下河身及六里車軸等河。加築六塘河兩岸。民堰五丈。義澤六里河頭各建石牯。中河通八。沿河草壩口。水底用亂石填高。薛家莊老隄頭。開通舊莞瀆河。加培兩岸子堰。以資收束。○又興修上江大川。滄沱。灘等河。疏濬潼河下游林。子河。謝家溝。沱河。並宿靈鳳等處大道兩旁官。溝。節節疏濬深闊。取出溝土。培築大道。增建橋。

梁以通積水。宿境之水導入澮河。靈鳳等處之水導入淮河。不使仍入沱河為患。又奏准下江大川沭沂兩河修築民堰。開挖河身。疏濬清桃二邑官溝。取出溝土。培築大道。導入包家河。以洩兩旁積潦。○九年。修理揚州府儀徵縣運口通濟羅泗二插。○又疏濬鹽河華家灘。大新河。王家港茅塘港邵伯通運引河。循次灌注。以達運河鹽河。○又疏濬通州境內任家港等處。以備宣洩。○又疏濬鹽城以南南北二串場河道。白駒等插。相機啟閉。插下引河。酌為疏導。它

濬蚌蜒梓新車路白塗海溝興鹽界河東西官河洩水要道以資利導。○又奏准范隄酌照芒稻插式將現在各插多加金門以廣出水之路。○十年議准江省工程尺寸不能盡一嗣後凡有大小工程均照部頒尺式修建。○十一年修濬灘河南北兩岸黃疇橋等處河道建設涵洞並潁州府淝河宋陽河蒙城茨河北淝河窪淺築埂建設橋梁。○又奏准六塘河上承宿遷縣駱馬湖出水逾桃源清河安東至沭陽錢家集分為二股南股由安東侯家口入鹽河歸海北

股由沭陽謝家莊龍溝口入鹽河歸海。接築南
北塘河子堰。建設涵洞。疏濬港河河身。築堰建
牐。○又疏濬沭陽滂溝蕩湯家溝上下增築子
堰。建設涵洞橋梁。○又奏准徐屬邳州沂河上
承邳沂之水。加築兩岸子堰。以資捍禦。○又奏
准海州前後沭河兩岸接築子堰。建設涵洞。疏
濬青伊湖薔薇河。○又疏濬海州境內鹽河。武
障義澤六里三河口。各設滾水石壩。開挖贛榆
三公河之子河。堵築大沙河。○又奏准淮揚徐
海等屬興修水利工程完竣。各府州屬長隄巨

川大橋大牖。歸官修理。其支河小港民堰路溝。令里民自行經理。分別廳汛州縣分司經管。統領道員各就所轄總理。本管知府直隸州。以及各同知通判等兼轄。不時督率稽察。每年秋汛後。經管官周巡確勘。又修築六塘等河子堰。並加培高厚。十二年。

諭。六塘浦河等處。每年加工修築。而每年仍復被災。必由前此經理未善。今遇大雨時行。又被暴漲衝漫。應詳悉經理。熟籌疏濬之方。務令宣洩通暢。不致泛溢。衝漫子堰。淹損田禾。為一勞永逸之計。以副注念。欽。

此遵

旨奏准。加培六塘。洮河前築堰工。疏濬宿遷桃源兩縣
境內兜灣河道。勢取徑直。展築舊堰。切去灘背。
以順河流。接建駱馬湖尾閘。永濟石橋四十丈。
開濬上下引河。以助分洩。○又奏准。六塘洮河
兩河堰工。嗣後每年農隙時。責成里民。按畝出
夫。酌量修補。於汎水長發之時。該地方官督率
民夫。協力搶護。分別段落里數。於有田業戶之
中。設立堰長。總司督催料理。○又議准。建築甘
泉縣東西灣二處滾水石壩。改建三合土壩。○

又修築范隄一千一百四十四丈二尺。○十三年增培邳州沂河兩岸民堰。○十四年疏濬宿州墨河。○十六年續培沭河卑矮隄堰。○又覆淮海州等八州縣除清河桃源既屢經試勘圩岸無益毋庸修築。應令各該縣於舊有河形及支河曲港之處俟農隙時董率農民隨時挑挖以備霖潦。至海州沭陽贛榆安東阜甯宿遷所有已成之圩岸仍令各該縣循照規條督率民夫歲修並多挑溝渠以備蓄洩其已勘未成者則令隨時次第舉行。至於地勢沙高並卑窪湖

蕩容水之地均不必强行修築。其六洑兩河已
經動帑修築之埝。雖異漲之水不能保護。而尋
常水勢藉以障禦。不無裨益。仍照題定之例。督
率民夫歲時修補。二十二年。建砌寶應縣護
城甃工。長七百八十六丈。二十三年。奏准。六
塘河南北兩岸隄堰。關係數州縣田廬。每年於
伏秋大汛。遴委專員防守。又奏准。中河廳屬
運河北岸鹽河石牐。年久損壞。勘度地勢。於該
牐迤上五十丈擇地另建。又修治淮徐海等
屬支幹河渠。又奏准。安省宿州境內洪濰二

河。按年修濬。歸官辦理。於藩庫匣費項下豫發銀三千兩。解存廬鳳道庫撥用。二十四年奏准。鳳。潁。泗三府屬溝渠塘壩。分別緩急。次第興修。又挑挖常熟昭文二縣屬白茆徐六涇海口。並移建牯座。又議准。淮徐河海等屬水利。幹支各河。業已挑濬深通。除本係河工。仍以河工之汎員為專管。廳員為兼轄外。如有關農田並關河工者。由地方官河官各分其任。如止洩田疇雨水。不關河工者。全歸地方官管理。均分別專管兼轄。以免誣卸。其有一河而跨數州縣

者。各按河道坐落分界管理。又一河應派二員
分管者。亦於分工處。各按界內河道。善為經理。
或勸用民力。或動帑開疏。如不隨時報明修濬。
即將專管兼轄之員。查明叅處。再邳州清定成
三牯越河。宿遷蔡家牯。寶應三里溝滾水壩。郎
兒牯子嬰南牯。邵伯減水三牯。關繫漕運河防。
歸河工動帑修理。其運鹽河仍歸商捐辦理。至
六塘河洪溝港河兩岸子堰。道遠工長。各縣按
里設立堰長。不時巡查。又宿桃歸仁隄工。原係
黃河廳汛專管。應於該廳汛內。調撥河兵數名。

巡防保護。霜降後撤回。○又奏准。沛縣境內改
挑茶城河。○二十五年奏准。宿州符離集。迎上
彭家溝。建兩空石牕一座。○二十六年議准。臨
淮縣西土埂。並五空橋座。及黃泥鋪石橋。係九
省通衢要道。被水衝刷坍塌。均酌量修築。以利
行旅。○二十九年。挑濬荆山橋河。並建築橋壩。
○三十二年。挑挖宿州境內洪溝河。睢河。自徐
溪口洪河尾起。至符離集止。並挑挖南岸之砂
礮河沙溝。北岸之西流河。彭家溝等工。○三十
四年題准。蘇常鎮三府屬。自吳江縣至丹陽縣。

運河土石塘路。並跨塘橋梁。一律修整。○三十
六年奏准。安慶府西門外漳荻港。歲需挑濬。將
城工餘贖銀二萬七千兩。發商籌備。以一分起
息。每年得息銀二千二百餘兩。約十年還本。其
息銀仍發商生息。以備歲修之用。○又挑濬宿
州境內西流砂礮等河。○三十八年。疏濬江南
省運鹽河。並於孔家涵口門。增設牯座。○四十
二年。修補儀徵縣響水牯。○四十四年。挑濬吳
縣境內銅坑等河淤淺。○四十五年。修理長洲
元和吳縣吳江震澤五縣沿海石塘。並順塘橋

座。四十六年。陽湖無錫宜興荆溪四縣之太湖各港口木柵。改建石柵。又修築安徽省鳳陽縣境內臨淮縣西土壩。四十七年。復淮。北鹽河。上通中河。為淮北行鹽葦營柴料及民間米糧貨物運行之路。每年重運漕船。於中河過畢之後。啟放鹽河牯壩。西有南北六塘兩股之水。穿過鹽河。由武障頂衝等河入海。每年水勢大小靡定。惟在相度規制。隨時蓄洩。以利商民。海州附近六塘河者。地勢最低。一遇水大。輒以草壩宣洩。不暢為詞。其實鹽河西鄉窪地。常

被水災。久經奏准減賦。勢不能為一隅成熟。輒將各壩啟放。以致鹽柴船隻淺阻。惟該河自乾隆二十五年商人大挑之後。迄今二十餘年。河身不無淤墊。且因黃河盛漲。開放王營減壩。由鹽河入海。亦有停沙之處。雖隨時撈挖。究不如從前之處。處處流通。督臣河臣咨會鹽臣。並飭司道委員。會同海州分司。將鹽河淤淺之處。逐細勘明。飭商一律挑挖。深通。遵照奏定水誌。及時啟閉。○又挑濬泗州謝家溝。沛河尾淤墊。○四十八年。挑挖師古灘河道。並建橋座涵洞。○又

開挑便民港及瓜洲城河。○又挑丹徒縣引河。並無錫陽湖金匱武進四縣河道。○又拆修鳳陽縣西關外橋座及南首輒岸。並挑挖新橋河道。○五十三年奏准安徽省藩庫所存社倉穀價內提銀十萬兩。借給通省農商。以一分行息。十年還本。仍將息銀借給生息。為籌備水利工程之用。每年造冊送部查覈。○又奏准銅山境內茅家隄大河溜勢北趨。不無吸溜之虞。應將外灘引渠移鑿山根。就山開鑿石槽。於兩頭砌成片石裏頭。形如牯座。迤下鑲作鉗口壩工。其

隄內引渠兩岸。並築子堰。以衛田廬。○又開濬
沈家莊新河。以達張家河舊道。並於張家河下
抵場河之舊道。逐段挑濬。另成新河一道。專引
運河清水濟運。再於張家河頭開挖引河。達於
方家渡。一律疏濬深通。俾鹽船湍運。由新河暢
出無阻。即河工運料柴船。向由舊鹽河者。亦改
由新河。免致稽遲。○又疏濬宿州之北股河。泗
州之濉河。高郵州之南澄子河。運鹽河。桃源縣
之大城橋河。沛縣之順隄石城二河。以資利導。
○五十五年。挑修碭山。蕭縣二屬之洪濉二河。

及淤淺河堰。○又挑濬泰州通州各場運鹽河道。